



PERATURAN TATATERTIB PELAJAR

AKTA UNIVERSITI DAN KOLEJ UNIVERSITI 1971

PERATURAN TATATERTIB PELAJAR

KOLEJ ASTIN 2013

SUSUNAN PERATURAN

BHGN	PERKARA	M/S
I :	PERMULAAN	2 – 4
II :	TATATERTIB AM	4
III :	KESALAHAN BERKAITAN AKADEMIK	4 – 9
IV :	KESALAHAN BERKAITAN TINGKAHLAKU / PERBUATAN / TINDAKAN	9 – 13
V :	TATACARA HUKUMAN TATATERTIB	13 – 16
VI :	AM	16

AKTA UNIVERSITI DAN KOLEJ UNIVERSITI 1971

PERATURAN TATATERTIB PELAJAR

KOLEJ ASTIN 2013

Pada menjalankan kuasa yang diberikan oleh Seksyen 16c Akta Universiti dan Kolej Universiti 1971[Akta 30], Lembaga Pengarah Kolej Astin membuat peraturan-peraturan seperti berikut:

BAHAGIAN I PERMULAAN

Nama & Singkatan

1. Kaedah-kaedah ini dinamakan **Peraturan Tatatertib Pelajar Kolej Astin (KA) 2013**.
2. **KA** merupakan singkatan bagi Kolej Astin.
3. **PHEP** merupakan singkatan bagi Pembangunan & Hal-Ehwal Pelajar.
4. **HEA** merupakan singkatan bagi Hal-Ehwal Akademik.

Definisi & Terma

5. Dalam peraturan-peraturan ini, melainkan jika konteksnya menghendaki makna yang lain :
 - 5.1 “Asrama” ertinya apa-apa kemudahan, dengan apa-apa jua nama yang dipanggil, yang disediakan oleh KA bagi kediaman pelajar;
 - 5.2 “Bilik Tatatertib” ertinya sesuatu bilik yang diuntukkan bagi maksud menjalankan prosiding tatatertib amnya atau bagi maksud prosiding tatatertib yang tertentu;
 - 5.3 “Dadah” ertinya apa-apa dadah atau bahan yang pada masa ini disenaraikan dalam Jadual Pertama kepada Akta Dadah Berbahaya 1952[Akta 234];
 - 5.4 “Judi” ertinya bermain apa-apa permainan beradu nasib, atau gabungan beradu nasib dan kemahiran, bagi wang atau nilai wang, dan termasuklah apa-apa pertaganan, apa-apa pertaruhan atau apa-apa loteri;
 - 5.5 “Kawasan kolej” ertinya sekitar kawasan KA termasuklah semua asrama, institusi dan bangunan yang dimiliki atau yang disewa oleh KA 2
 - 5.6 “Kakitangan” ertinya mana-mana pekerja KA;
 - 5.7 “Kesalahan tatatertib” ertinya suatu kesalahan di bawah Kaedah-Kaedah ini.
 - 5.8 “menipu” termasuklah meniru.
 - 5.9 “minuman keras” ertinya apa-apa minuman keras yang mempunyai apa-apa kekuatan alkohol;
 - 5.10 “Pengarah Tatatertib” ertinya pegawai KA, dan termasuklah mana-mana orang atau kumpulan orang yang diberi kuasa oleh Pengarah untuk bertindak bagi pihaknya;
 - 5.11 “Orang yang diberi kuasa” ertinya mana-mana orang atau kumpulan orang yang diberi kuasa dengan sewajarnya untuk bertindak bagi pihak KA;

- 5.12 “Pelajar” termasuklah mana-mana pelajar sepenuh masa, pelajar sambilan, pelajar diploma yang menjalani pengajian di KA.
- 5.13 “Pelajar pemegang biasiswa” termasuklah mana-mana pelajar yang sedang belajar atas biasiswa, dermasiswa, pinjaman, tajaan, cuti bergaji atau tanpa gaji, atau atas pemberian atau apa-apa kemudahan lain, daripada mana-mana kerajaan, institusi, pihak berkuasa berkanun, organisasi perdagangan atau perniagaan atau badan lain;
- 5.14 “Peperiksaan” termasuklah apa-apa cara atau kaedah penilaian yang menyebabkan markah atau gred diberikan bagi sesuatu kursus atau sebahagian daripada kursus tertentu;
- 5.15 “Posiding tatatertib” ertinya prosiding tatatertib di bawah Peraturan-Peraturan Tatertib ini.
- 5.16 “Racun” ertinya apa-apa bahan yang dinyatakan melalui nama dalam ruang pertama Senarai Racun kepada Akta Racun 1952[Akta 366] dan termasuklah apa-apa sediaan, larutan, sebatian, campuran atau bahan semulajadi yang mengandungi bahan itu.

BAHAGIAN II TATATERTIB AM

Larangan am

Dikuatkuasakan kepada semua pelajar Kolej Astin (KA) yang mendaftar sepenuh masa dari tarikh hari pendaftaran.

Seseorang pelajar hendaklah:

1. Berkelakuan baik dan mematuhi segala undang-undang dan peraturan yang telah ditetapkan oleh pihak pengurusan sepanjang mengikuti pembelajaran di KA dan rela menerima tindakan tatatertib sekiranya melanggar peraturan yang telah ditetapkan tidak kira sama ada kesalahan besar atau pun ringan.
2. Menjaga nama baik KA dan menghormati semua kakitangan KA pada setiap masa.

BAHAGIAN III KESALAHAN BERKAITAN AKADEMIK / PENGAJIAN

Larangan Am

1. Seseorang pelajar **tidak boleh**:
 - a. menjalankan urusannya, sama ada di dalam atau di luar KA, dalam apa-apa cara yang merosakkan atau memudaratkan :
 - i. kepentingan, kesejahteraan atau nama baik KA, mana-mana pelajar, kakitangan, pegawai atau pekerja KA; atau
 - ii. Ketenteraman atau keselamatan awam, moral, kesopanan atau tatatertib;
 - b. mencabuli apa-apa peruntukan mana-mana undang-undang bertulis, sama ada di dalam KA atau di luar KA;
 - c. mengganggu atau dalam apa-apa cara campur tangan, atau menyebabkan supaya diganggu atau dalam apa-apa cara campur tangan, apa-apa pengajaran, pengajian, penyelidikan, kerja pentadbiran, atau apa-apa kegiatan yang dijalankan oleh atau di bawah arahan atau dengan kebenaran KA;

- d. melarang, menghalang atau mengganggu, atau menyebabkan supaya dilarang, dihalang atau diganggu, mana-mana pegawai atau pekerja KA atau mana-mana orang yang bertindak di bawah arahan atau kebenaran pegawai atau pekerja itu, daripada menjalankan kerja, kewajipan atau tugasnya;
- e. melarang atau menghalang, atau menyebabkan supaya dilarang atau dihalang, mana-mana pelajar daripada menghadiri mana-mana kuliah, tutorial atau kelas, atau daripada mengambil bahagian dalam apa-apa kegiatan yang sah;
- f. menganjur, menghasut atau menyertai pemulauan apa-apa peperiksaan, kuliah, tutorial, kelas atau kegiatan sah lain yang dijalankan oleh atau di bawah arahan, atau dengan kebenaran KA;
- g. merosak, mengubah, mengganggu, mengalih atau dalam apa-apa cara berurusan dengan apa-apa bahan, objek, artikel atau harta dalam KA;
- h. melakukan apa-apa perbuatan atau menyebabkan apa-apa perbuatan dilakukan di dalam KA, supaya menyebabkan atau mungkin menyebabkan apa-apa halangan, kesulitan, kegusaran, kerugian atau kerosakan kepada mana-mana orang di dalam KA;
- i. melanggar apa-apa arahan atau kehendak Pustakawan KA, anggota kakitangan perpustakaan atau pekerja perpustakaan lain berkenaan dengan penggunaan perpustakaan, buku-buku dalam perpustakaan dan kemudahan-kemudahan lain dalam perpustakaan;
- j. melanggar apa-apa arahan atau kehendak seseorang orang yang diberi kuasa berkenaan dengan penggunaan mana-mana makmal, peralatan makmal, perkakas atau bahan, dan kemudahan lain dalam makmal.

Menghadiri kuliah

- 2. Jika seseorang pelajar dikehendaki hadir mana-mana kuliah, tutorial, kelas atau pengajaran lain berhubungan dengan kursus pengajiannya, dia tidak boleh tidak hadir kuliah, tutorial, kelas atau pengajaran lain yang berhubungan dengan kursus pengajiannya itu tanpa kebenaran terdahulu Bahagian Pengajian Dan Hal-Ehwal Akademik (PHEA), mengikut mana-mana yang berkenaan. Jika hal keadaan tidak membenarkan kebenaran terdahulu diperoleh, pelajar hendaklah, dengan seberapa segera yang boleh selepas itu, memuaskan hati Pengarah PHEA, mengikut mana-mana yang berkenaan, berkenaan dengan ketidakhadirannya dan memperoleh kelulusan berkenaan dengan ketidakhadirannya itu.

Sekatan ke atas penggunaan teks kuliah

- 3. i. Tertakluk kepada sub-peraturan (2), seseorang pelajar tidak boleh menggunakan teks mana-mana kuliah atau pengajaran yang disampaikan kepadanya di KA kecuali bagi maksud mengikuti kursus pengajiannya; terutamanya, dia tidak boleh membuat salinan dalam apa-apa cara tentang kesemua atau mana-mana bahagian teks itu bagi maksud penerbitan, pembahagian atau pengedaran, sama ada untuk bayaran atau tidak.
- ii. Tiada apa-apa jua dalam kaedah ini boleh disifatkan sebagai menghadkan budi bicara Pengarah PHEA untuk mengeluarkan garis panduan bagi membenarkan seseorang pelajar, atas sesuatu pertubuhan, badan atau kumpulan pelajar, membuat salinan teks mana-mana kuliah atau pengajaran di bawah kawalan dan arahan Pengarah PHEA dan Pengarah PHEA boleh mengenakan dalam garis panduan itu apa-apa terma dan syarat yang disifatkannya perlu atau sesuai berkenaan dengan pengeluaran semua teks mana-mana kuliah atau pengajaran.

Larangan terhadap plagiarisme

4. i Seseorang pelajar tidak boleh memplagiat apa-apa idea, penulisan, data atau ciptaan orang lain.
- ii. Bagi maksud kaedah ini, plagiarisme termasuklah-
 - a. perbuatan mengambil sesuatu idea, penulisan, data atau ciptaan orang lain dan mendakwa bahawa idea, penulisan, data atau ciptaan itu adalah hasil dapatan atau ciptaannya sendiri; atau
 - b. suatu cubaan untuk menonjolkan atau perbuatan menonjolkan, dalam apa-apa cara, bahawa dia ialah sumber asal atau pencipta sesuatu idea, penulisan, data atau ciptaan yang adalah sebenarnya diambil daripada beberapa sumber lain.
- iii. Tanpa menjejaskan keluasan makna subpara (ii), seseorang pelajar memplagiat apabila dia:
 - a. menerbitkan, dengan dirinya sebagai pengarang, suatu ringkasan, artikel kertas saintifik atau akademik, atau buku yang pada keseluruhannya atau sebahagiannya ditulis oleh beberapa orang lain;
 - b. menggabungkan dirinya atau membenarkan dirinya digabungkan sebagai pengarang bersama sesuatu ringkasan, artikel, kertas saintifik atau akademik, atau buku, apabila dia tidak langsung membuat apa-apa sumbangan bertulis kepada ringkasan, artikel, kertas saintifik atau akademik, atau buku itu;
 - c. memaksa orang lain untuk memasukkan namanya dalam senarai penyelidik bersama bagi sesuatu projek penyelidikan tertentu atau dalam senarai penyelidik bersama bagi penerbitan apabila dia tidak membuat apa-apa sumbangan yang boleh melayakkan dirinya sebagai penyelidik bersama atau pengarang bersama;
 - d. memetik data akademik yang adalah hasil penyelidikan yang dijalankan oleh beberapa orang lain, seperti dapatan makmal atau dapatan kerja lapangan atau data yang diperoleh melalui penyelidikan perpustakaan, sama ada diterbitkan atau tidak diterbitkan, dan menggabungkan data tersebut sebagai sebahagian daripada penyelidikan akademiknya tanpa memberi pengiktirafan sewajarnya kepada sumber asal;
 - e. menggunakan data penyelidikan yang diperoleh melalui kerja usaha sama dengan beberapa orang lain, sama ada atau tidak orang lain itu anggota kakitangan atau pelajar Kolej / Universiti sebagai sebahagian daripada penyelidikan akademik yang berbeza yang lain, atau bagi penerbitan atas namanya sendiri sebagai pengarang tunggal, tanpa memperoleh keizinan penyelidik bersamanya sebelum memulakan penyelidikan peribadinya atau sebelum menerbitkan data;
 - f. menyalin idea atau ciptaan orang lain yang disimpan dalam apa-apa jua bentuk, sama ada bertulis, tercetak atau tersedia dalam bentuk elektronik, atau dalam bentuk slaid, atau dalam apa-apa jua bentuk pengajaran atau perkakas penyelidikan atau dalam apa-apa bentuk lain dan mengaku sama ada secara langsung atau tidak langsung bahawa dia ialah pencipta idea atau ciptaan itu.
 - g. menterjemahkan tulisan atau ciptaan orang lain daripada satu bahasa kepada bahasa lain sama ada atau tidak secara keseluruhan atau sebahagian, dan kemudian mengemukakan terjemahan itu dalam apa-apa jua bentuk atau cara sebagai penulisannya atau ciptaannya sendiri; atau
 - h. memetik idea daripada penulisan atau ciptaan orang lain dan membuat beberapa ubahsuaian tanpa rujukan sewajarnya kepada sumber asal dan menyusunnya semula dalam apa-apa cara yang seolah-olah dia ialah pencipta idea-idea itu.

Kehadiran dalam peperiksaan

5. i. Jika kursus pengajian seseorang pelajar memerlukan dia hadir bagi sesuatu peperiksaan dan dia tidak selainnya dihalang daripada peperiksaan itu, dia tidak boleh tidak hadir tanpa kebenaran terdahulu Pengarah PHEA, mengikut mana-mana yang berkenaan.

- ii. Jika hal keadaan tidak membenarkan kebenaran terdahulu diperoleh, pelajar hendaklah memuaskan hati Pengarah PHEA, mengikut mana-mana yang berkenaan, berkenaan dengan ketahadirannya dan memperoleh kelulusan berkenaan dengan ketahadirannya itu.

Kelakuan semasa peperiksaan

6. Tiada pelajar boleh:

- i. mengambil apa-apa buku, kertas kerja, dokumen, gambar atau benda lain, kecuali yang diberi kuasa oleh pemeriksa, ke dalam atau ke luar dari sesuatu bilik peperiksaan, atau menerima apa-apa buku, kertas kerja, dokumen, gambar atau benda lain daripada mana-mana orang lain semasa dalam bilik peperiksaan, kecuali seseorang pelajar boleh, semasa dia di dalam bilik peperiksaan, menerima daripada pengawas peperiksaan apa-apa buku, kertas kerja, dokumen, gambar atau benda lain yang telah disyorkan oleh pemeriksa atau Lembaga Pemeriksa, dan diberi kuasa oleh Pengarah PHEA;
- ii. menulis, atau telah menulis melalui orang lain, apa-apa maklumat atau gambar rajah yang mungkin berkaitan dengan peperiksaan yang didudukinya, di atas tangannya atau di atas mana-mana bahagian lain tubuh badannya, atau di atas pakaiannya;
- iii. berhubung dengan mana-mana pelajar lain semasa sesuatu peperiksaan melalui apa-apa jua cara; atau
- iv. menipu atau cuba untuk menipu atau berkelakuan mengikut cara yang boleh ditafsirkan sebagai menipu atau cuba untuk menipu dalam sesuatu peperiksaan, semasa peperiksaan itu sedang dijalankan.

BAHAGIAN IV KESALAHAN BERKAITAN TINGKAHLAKU / PERBUATAN / TINDAKAN

Berjudi

1. Tiada seorang pelajar dan tiada sesuatu pertubuhan badan atau kumpulan pelajar boleh mengatur, mengurus, menjalankan atau membantu dalam mengatur, mengurus, menjalankan atau menyertai apa-apa judi, pertaruhan atau loteri di dalam kawasan atau mana-mana bangunan milik Kolej KA atau di luar.

Gangsterisme

2. Pelajar adalah dilarang sama sekali dari menubuhkan atau menyertai atau melibatkan diri dalam apa jua aktiviti atau kumpulan yang berbentuk 'Gangsterisme'.

Berkhalwat / Berzina

3. Mana-mana pelajar KA didapati bersama dengan pasangannya (berlainan jantina) tidak kira samada seseorang itu Islam atau tidak dan mereka itu bukan isterinya/suaminya atau bukan mahramnya di tempat sunyi, atau dalam sebuah bilik pada mana-mana bangunan KA atau asrama KA atau di luar KA dalam keadaan yang boleh mendatangkan syak atau mereka ada bertujuan melakukan zina adalah menjadi satu kesalahan besar.

Ajaran Sesat

4. Seseorang pelajar Islam tidak boleh melakukan pemujaan atau penyembahan atau ajaran sesat atau ilmu hitam atau mana-mana aktiviti yang bercanggahan dengan ajaran Islam.

Minuman Keras

5. Tiada seorang pelajar KA boleh meminum atau dalam miliknya atau di bawah jagaannya atau kawalannya apa-apa minuman keras dalam atau di kawasan asrama. Seseorang pelajar yang didapati dalam keadaan mabuk akibat dari meminum minuman keras adalah bersalah atas suatu kesalahan tatatertib.

Dadah / Ganja / Racun

6. Tiada seorang pelajar boleh ada dalam miliknya atau di bawah jagaannya atau kawalannya apa-apa dadah atau racun. Tiada seorang pelajar boleh mengguna, memberi, membekal, mengada atau menawarkan atau bercadang hendak memberi, membekal, mengada atau menawarkan apa-apa dadah atau racun kepada mana-mana orang. Seseorang pelajar yang didapati dalam keadaan pengaruh apa-apa dadah atau racun adalah bersalah atas suatu kesalahan tatatertib.

Makanan Tidak Halal

7. Pelajar adalah sama sekali dilarang membawa makanan tidak halal ke dalam kampus mahupun asrama.

Mencuri

8. Pelajar adalah dilarang sama sekali menggunakan, mengambil atau dalam erti kata lain mencuri barang – barang tidak kira sama ada harta kepunyaan kampus, asrama mahupun milik rakan ataupun mana – mana organisasi atau individu luar.

Ragging

9. ‘Ragging’ dalam segala bentuk adalah dilarang sama sekali. Permainan yang membahayakan seperti membaling “waterbomb” dan sebagainya adalah juga dilarang.

Membawa atau Menggunakan Senjata Berbahaya

10. Pelajar tidak dibenarkan membawa, menyimpan, memiliki, mengedar atau menggunakan senjata atau benda tajam yang boleh mencederakan atau memudaratkan individu lain.

Merusuh atau Demonstrasi

11. Pelajar-pelajar tidak dibenarkan mengadakan, menyertai atau melibatkan diri dalam sebarang perjumpaan haram, demonstrasi atau rusuhan tidak kira sama ada ianya dilakukan ketika di dalam kampus mahupun di luar.

Lumba Haram

12. Pelajar-pelajar adalah dilarang daripada menyertai, menganjurkan atau melibatkan diri dalam sebarang perlumbaan haram tidak kira sam ada perlumbaan motor ataupun kereta.

Bahan Lucah

13. Tiada seorang pelajar dan tiada sesuatu pertubuhan, badan atau kumpulan pelajar bagi membahagikan, mengedar atau mempamerkan atau menyebabkan dibahagikan, diedar atau mempamerkan atau menyebabkan membahagikan, mengedar atau mempamerkan atau dipamerkan atau dengan apa-apa cara mengambil bahagian dalam membahagi, mengedar atau mempamerkan apa-apa bahan lucah di dalam kawasan asrama; seseorang pelajar adalah disifatkan sebagai membahagikan, mengedar atau mempamerkan sesuatu bahan lucah, tidak kira

sama ada pembahagian, pengedaran atau pameran adalah untuk mendapat bayaran atau apa-apa balasan lain. Tiada seorang pelajar boleh dengan sengaja melihat atau dengan sengaja mendengar apa-apa bahan lucah.

Menyertai Pertubuhan Politik

14. Tiada seseorang pelajar boleh menyertai atau mengambil bahagian dalam mana-mana parti politik samada secara rasmi atau tidak rasmi.

Memasuki bahagian atau bangunan Kampus yang dilarang

15. Seseorang pelajar tidak boleh masuk ke dalam mana-mana bahagian KA atau mana-mana bahagian bangunan di dalam KA, yang kemasukan ke dalamnya dilarang kepada pelajar amnya atau, terutamanya, kepada pelajar atau sesuatu kelas pelajar.

Penerbitan, dsb., dokumen

16. Tiada pelajar, pertubuhan, badan atau kumpulan pelajar, tanpa kebenaran terdahulu Pengarah PHEP, boleh menerbitkan, membahagi-bahagikan atau mengedarkan apa-apa dokumen di dalam atau di luar KA.

Kegiatan pelajar di luar Kolej

17. Tiada pelajar, pertubuhan atau kumpulan pelajar, boleh menganjurkan, menjalankan atau menyertai apa-apa kegiatan di luar KA yang mendatangkan kesan buruk secara langsung kepada KA atau yang memudaratkan kepentingan KA. Pengarah PHEP boleh mengeluarkan garis panduan berkenaan dengan kegiatan yang memudaratkan kepentingan KA.

Pelajar yang melibatkan diri dalam pekerjaan, dsb.

18. Tiada pelajar boleh, di dalam KA atau di luar KA, melibatkan diri dalam apa-apa pekerjaan, pengajian, perniagaan, perdagangan atau kegiatan lain, sama ada atas dasar sepenuh masa atau sambilan, yang pada pendapat Pengarah PHEP tidak diingini.

Kebersihan di dalam Kampus

19. Seseorang pelajar tidak boleh melakukan apa-apa yang boleh menjejaskan kebersihan dan kekemasan tempat tinggal seseorang pelajar di dalam Kampus, atau mana-mana asrama, dewan kuliah, jalan, kawasan atau mana-mana bahagian Kampus lain, atau mana-mana bangunan atau binaan lain di dalam Kampus.

Membuat bising

20. Seseorang pelajar tidak boleh membuat apa-apa bunyi atau bising, atau menyebabkan apa-apa bunyi atau bising dikeluarkan, dalam apa-apa cara, jika bunyi atau bising itu menyebabkan atau mungkin menyebabkan kemarahan atau gangguan kepada mana-mana orang di dalam Kampus.

Pemeriksaan ke atas pelajar yang disyaki mempunyai gangguan mental

21. Pengarah PHEP boleh menghendaki seseorang pelajar yang disyaki mempunyai gangguan mental menjalani pemeriksaan perubatan oleh pengamal perubatan yang berkelayakan.

Pakaian pelajar

22. Pengarah PHEP boleh mengeluarkan apa-apa arahan, secara bertulis, yang difikirkannya perlu yang berhubungan dengan cara berpakaian pelajar di kolej.

Keingkaran

23. Jika seseorang pelajar melanggar apa-apa arahan atau kehendak yang sah yang diberikan atau dibuat oleh mana-mana pegawai atau pekerja Universiti yang diberi kuasa memberi atau membuat arahan atau kehendak di dalam Kampus, pelajar itu adalah melakukan suatu kesalahan tatatertib.

BAHAGIAN V TATACARA HUKUMAN TATATERTIB

Hukuman Tatatertib

1. Seseorang pelajar yang melakukan sesuatu kesalahan tatatertib di bawah Peraturan Tatatertib ini dan didapati bersalah atas kesalahan itu boleh dikenakan mana-mana satu atau mana-mana gabungan dua atau lebih hukuman yang sesuai yang berikut:
 - i. amaran;
 - ii. denda tidak melebihi dua ratus ringgit;
 - iii. dilarang daripada mana-mana bahagian atau bahagian-bahagian tertentu Kolej bagi tempoh yang ditetapkan;
 - iv. digantung daripada menjadi seorang pelajar KA bagi tempoh yang ditetapkan;
 - v. dipecat dari KA.

Kehadiran di hadapan pihak berkuasa tatatertib

2. Jika pada pendapat pihak berkuasa tatatertib bahawa seseorang pelajar telah melakukan sesuatu kesalahan tatatertib di bawah Kaedah-Kaedah ini, pihak berkuasa tatatertib hendaklah memberitahu pelajar tentang kesalahan tatatertib yang didakwa itu dan menghendaki pelajar itu hadir di hadapannya di suatu bilik tatatertib pada tarikh dan masa yang ditetapkan oleh pihak berkuasa tatatertib.

Akibat tidak hadir di hadapan pihak berkuasa tatatertib

3. Jika seseorang pelajar tidak hadir di hadapan pihak berkuasa tatatertib mengikut Para 25, dia hendaklah dengan serta merta digantung daripada menjadi pelajar Universiti dan tidak boleh selepas itu berada di dalam atau memasuki Kampus; Penggantungan itu hendaklah berterusan sehingga pelajar menawar untuk hadir di hadapan pihak berkuasa tatatertib dan ada, hakikatnya, hadir di hadapan pihak berkuasa tatatertib pada tarikh dan pada masa yang ditetapkan oleh pihak berkuasa tatatertib selepas pelajar itu menawarkan untuk hadir di hadapan pihak berkuasa tatatertib.

Penjelasan fakta dan pengambilan rayuan

4. Dalam prosiding tatatertib, pihak berkuasa tatatertib hendaklah menjelaskan kepada pelajar tentang fakta kesalahan tatatertib yang didakwa telah dilakukan oleh pelajar dan meminta pelajar membuat pengakuan atas kesalahan itu.

Pengakuan bersalah dan tatacara berikutnya

5. Jika pelajar mengaku salah, pihak berkuasa tatatertib hendaklah menerangkan kepadanya tentang fakta kes. Jika pelajar mengaku tentang fakta ini dan pihak berkuasa tatatertib berpuas hati bahawa suatu kesalahan pada

hakikatnya telah dilakukan daripada fakta tersebut, pihak berkuasa tatatertib itu hendaklah mengumumkan dia bersalah atas kesalahan tatatertib dan memintanya untuk mengemukakan apa-apa rayuan untuk meringankan hukuman.

Tatacara apabila pelajar mengaku tidak bersalah

6. Jika pelajar mengaku bahawa dia tidak bersalah atas kesalahan tatatertib atau gagal atau enggan membuat pengakuan atau tidak mengaku akan fakta kes, pihak berkuasa tatatertib hendaklah memeriksa mana-mana saksi atau apa-apa dokumen atau artikel lain bagi menyokong kes terhadap pelajar; pelajar hendaklah diminta menyoal saksi dan memeriksa apa-apa dokumen atau artikel dan pihak berkuasa tatatertib itu boleh memeriksa semula saksi. Saksi hendaklah dipanggil untuk memberikan keterangan dalam pembicaraan oleh Pengarah PHEP.

Keterangan Pelajar

7. Selepas keterangan yang tersebut dalam Bahagian V para (6) diterima, dan pihak berkuasa tatatertib mendapati bahawa ada suatu kes untuk dijawab, pelajar hendaklah diminta memberikan keterangannya, memanggil mana-mana saksi atau mengemukakan apa-apa dokumen atau apa-apa artikel lain bagi pembelaannya; pihak berkuasa tatatertib boleh menyoal pelajar atau mana-mana daripada saksi pelajar dan memeriksa apa-apa dokumen atau artikel, dan pelajar boleh memeriksa semula mana-mana daripada saksinya itu.

Memanggil semula saksi

8. Pihak berkuasa tatatertib boleh menyoal atau memanggil semula mana-mana saksi pada bila-bila masa sebelum pihak berkuasa itu mengumumkan keputusannya.

Penqumuman keputusan

9. Selepas mendengar keterangan saksi-saksi dan memeriksa dokumen atau artikel lain yang dikemukakan di hadapannya, pihak berkuasa tatatertib hendaklah mengumumkan keputusannya dalam kes itu, dan jika pihak berkuasa itu memutuskan bahawa pelajar adalah bersalah atas kesalahan tatatertib, pihak berkuasa tatatertib itu hendaklah meminta pelajar membuat apa-apa rayuan untuk meringankan hukumannya.

Penqenaan hukuman

10. Selepas pelajar mengemukakan hujah bagi meringankan hukumannya, jika ada, di bawah Peraturan Bahagian V Para (5) atau (9), mengikut mana-mana yang berkenaan, pihak berkuasa tatatertib hendaklah mengenakan ke atas pelajar satu daripada hukuman yang dinyatakan dalam Bahagian V para (1) atau mana-mana dua atau lebih gabungan hukuman yang sesuai.

Bayaran denda

11. Jika pihak berkuasa tatatertib mengenakan hukuman denda ke atas pelajar, pihak berkuasa tatatertib itu hendaklah menyatakan tempoh yang denda hendaklah dibayar dan pelajar hendaklah membayar denda dalam tempoh tersebut kepada Bahagian Akaun. Tempoh tersebut hendaklah tidak kurang daripada empat belas hari dari tarikh keputusan pihak berkuasa tatatertib.

Tidak membayar denda

12. Jika pelajar tidak membayar denda dalam tempoh yang ditetapkan, dia hendaklah dengan serta-merta digantung daripada menjadi pelajar KA dan tidak boleh selepas itu berada di dalam atau memasuki KA; penggantungan itu hendaklah berterusan sehingga denda dibayar.

BAHAGIAN VII AM

KesalahanTatatertib

1. Seseorang pelajar yang melanggar mana-mana Kaedah-Kaedah ini, atau mana-mana garis panduan, arahan, petunjuk, sekatan, syarat atau terma yang dikenakan atau diberikan di bawah Kaedah-Kaedah ini, adalah melakukan suatu kesalahan tatatertib.

Kaedah-Kaedah ini tidak mengurangkan tanggungan jenayah

2. Tiada apa-apa jua dalam Kaedah-Kaedah ini boleh mengurangkan tanggungan mana-mana pelajar atau orang lain bagi apa-apa kesalahan di bawah mana-mana undang-undang bertulis.

<i>Diterbitkan oleh Bahagian Pembangunan & Hal-Ehwal Pelajar (PHEP) Edisi 2013</i>
